

# 'Fluba nen Zud -a cren -te

<sup>1</sup>An 'bɔ Zud nen Zaji "bui -a be, an ya Zozi Crizi 'suzan 'a. Mɛɛn 'fluba 'gʊɛ -a cren -te minnun pɛɛnɔn nen Bali o laabu be -wɛ. -Kaa "tɪ Bali 'ka ye "yi, ɛn -a yie a 'ka da -trilii -e Zozi Crizi 'e 'ta.

<sup>2</sup>Bali -le nyrinda, 'lee 'yee -fudɪ -trɔɔ, 'lee 'yee yɪdɪ "yi 'e drɛ 'cee vɛ -a 'e ciula "da!

**'Ka dre "yi minnun nen o 'wɪ ve 'wɪlu 'a Bali wei da be o va!**  
(2 Pi 2.1-17)

<sup>3</sup>An beenun, -a -cin a 'an 'ji 'e tede 'kpa tɪgtɪ 'nan, 'an 'fluba 'cren -teɛ 'cɛɛ, -kaa 'si nen Bali -a 'wɪ 'wɪ 'ji be -a da. 'Pian maan 'yɪ 'nan, e ya 'le 'an 'wɪ 'pla 'cɛɛ. 'Wɪ zɪɛ -nyrɛn 'nan: Bali -le 'wɪ 'nɔnɔnɔn nen -kaa yi -tɛra "da "be, 'ka 'tɔ "da 'plɛblɛ! Bali -a -nɔn minnun nen o cɪ -yee vɛ -a be -wɛ, ɛn ya'a 'limlan 'li "fo "dɪ. <sup>4</sup>'Wɪ zɪɛ maan 'pla 'cɛɛ, kɔɔ min -mienun wɪa 'ka yei 'e yɔɔdɪ. Wa'a 'ta 'wɔla Bali wei da dɪ, ɛn o 'wɪ 'wɪdɪ "dra te waa "paa 'nan, Bali -le 'yi 'be -si -nɔn 'wɛ. 'Wɪ zɪɛ -a drɛdɪ -ji be, Minsan Zozi Crizi nen -kaa tazan -a 'e -tɔwɪli "be, -a 'bɔ nen waa -tua 'o 'pɛla koda. Minnun zɪɛ 'wɪ nen e "ta -taa "bɔɛ o man be, waa cren -te Bali -le 'fluba 'ji 'e 'cɛn.

<sup>5</sup>'Wɪnun nen 'gʊɛ kaa -tɔɔ 'e 'cɛn 'va, ɛn an ya "vale 'an -cin -tɔɔ 'nyian 'ka 'ji. 'Li 'kpa be, Minsan 'yee minnun Izrael 'nɔn 'si Ezipti nɔnba -ji, 'pian "be -sru minnun nen wa'a yi -tɛɛɛ "da "dɪɛ, e o -nan -nyan. <sup>6</sup>ɛn 'nyian be 'ka 'ci "nrɔn 'wɪ nen e 'bɔ Bali -le 'pasianɔn nen laji be o -mienun man be -a da. 'Wɪ zɪɛ -nyrɛn 'nan: Bali 'plɛblɛ 'nɔn -wɛ, ɛn wa'a 'wɪɛ 'be man dɪ. Fɛnan nen Bali o -nyran be, -wɛɛ 'tɔtɪ. -Yee 'wɛan Bali o yɪɪ, ɛn e o 'pla klun 'pɔ 'va. O -fo -nan zɪɛ, -trilii -e tin 'ba yi -dan 'e 'bɔ. <sup>7</sup>'Fla nen waa laabo Sodɔm 'lee Gomɔr be 'lee 'flanun nen o 'srɔn "be, o -cin 'e -trɔɔ 'ka 'ji 'nyian. 'Fla zɪɛ -a da 'nɔn be, 'wɪ 'tɔwɪli "nen Bali -le 'pasianɔn zɪɛ

waa dre be, -a 'bɔ nɛn 'o dre. Kɔɔ 'o 'fli -nɔn -kɔnnen -wɛɛdi 'lee li -wɛɛdi le, te 'wɛnɛn nɛn blamin 'ka -a dra diɛ, waa "paa 'nyranman -a. -Yee "wɛan Bali 'wɛ 'nɛn -kɔɔn -wle 'te nɛn ya'a 'driman 'li 'mlɔnmlɔn diɛ -a. Bali 'wɛ zɛ -a dre 'nan -e 'e dre -cee 'wɛ -kɔɔn "manvɛ -a.

<sup>8</sup>Minnun nɛn o wla 'ka yei "bɛ, 'wɛ 'tuwli zɛ -a 'bɔ nɛn waa dra. Nyrin nɛn waa -tea "bɛ, -a da nɛn o 'wɛ "paa -e 'o 'wɛ 'wɛliɔ 'dre, -e 'o Bali wei -fɔla 'o 'trɔɛn -sru, -e 'o 'tɔ srɔ Bali -le 'pasianɔn nɛn laji ɛn o ci -dan -a bɛ, o man. <sup>9</sup>Bali -le 'pasianɔn nɛn laji bɛ, o tazan -dan nɛn waa laabo Mishel bɛ, ya'a 'wɛ zɛ -a drele di. Tu nɛn 'o 'vale Satan -a o Moizi pa ta wɛ 'vɛ bɛ, ya'a 'tɔ srɔle Satan man di. Yaa 'vɛ 'pian -yɛ 'nan: «Minsan 'e 'wɛ 'nɛn -kɔɔn 'yie!»

<sup>10</sup>'Pian minnun 'labɛ o 'tɔ srɔman fɛ nɛn wa'a 'tɔa diɛ -a man. O -blɔ "taan "le -winun -zv. 'Wɛ nɛn e -trɔa 'o 'wulo -ji bɛ, -a da nɛn o 'ta 'wula, o 'bɔ 'nan -nyan wɛ nɛn.

<sup>11</sup>'Wɛ -taa "bɔle o man. Kɔɔ -si -tuwli "nɛn Kaɛn 'ta 'wula "da 'li bɛ, -a da nɛn o -sɔɔnla. ɛn "lala yidi "yi "le "wɛan, 'wɛ 'wɛliɔ "nɛn Balam a dre 'li bɛ, -a -tuwli "nɛn o ci -a drɛnan. ɛn o wluan Bali man "le zɛ Kore -a dre 'li bɛ -yee 'wɛ 'zv. O -nan -nyan wɛ nɛn.

<sup>12</sup>-Te Zozinɔn 'o cin 'yɛ 'nan, -e 'o fɛ -blɛ 'e cin va bɛ, vɛ -mienun zɛ o ya 'o yei. 'Yra 'ka 'o yie man fɛ -blɛnan di. O 'bɔ 'pɔn -ji fɛ nɛn waa -wɛɛman. Wɛɛ -maan minnun 'ka 'tɔ srɛman. Vɛ -mienun zɛ o ya "le 'nan laa 'bɛ wla "ji, 'pian 'yi 'ka "ji -e 'e 'fɛn di, fulɔ -ciala waa "da. ɛn o ya "nyian "le yiba "nɛn -a ba tu 'bɔ, te -a 'blɔ "ka "man "diɛ, -yee 'wɛ 'zv. O ya "le yiba "nɛn waa 'sura bɛ, -yee 'wɛ 'zv. O -ka "fo. <sup>13</sup>Waa dra "le zɛ jemie 'e 'blɔ -fɔa, -e 'e 'va "tri wɛɛn bei "bɛ, -yee 'wɛ 'zv. Waa dra "le mɛn crɛn nɛn e 'si 'e 'tɔ -nan bɛ, -yee 'wɛ 'zv. Klun 'pɛ tiidii 'va nɛn Bali o -nyran "nan 'pla. -A -nan nɛn, o -fo 'li 'trilii.

<sup>14</sup>'Li bɛ Enɔk nɛn Adan klu 'sɔravɛlɛzan 'a bɛ, e minnun zɛ 'wee 'wɛ 'vɛ. Yaa 'vɛ 'nan: «"Ka 'yio! Minsan -taa 'o 'vale 'yee 'pasianɔn nɛn laji bɛ o "kaga 'kpa -a, <sup>15</sup>-e 'e 'trɛdanɔn pɛɛnɔn 'le tin 'ba. E 'wɛ "nɛn -kɔɔnman minnun nɛn o dre wɛ ci -wɛliɔ "bɛ -wle, 'wɛnɛn nɛn waa dre "va 'zia -wɛliɔ 'lee 'wɛnɛn nɛn waa 'vɛ "va 'zia -wɛliɔ "bɛ -a man.»

<sup>16</sup>Minnun zɛ o ci 'ka 'li 'sɔle di. 'Wɛ pɛɛnɔn nɛn e bɔa "o man bɛ, o wunwun "ve "da. O 'ta 'wula 'o 'ci 'sɔ wɛnɛn -wɛliɔ "da. Wei -dandan a o 'le, ɛn o minnun see "paaman wei 'nɔnɔn 'a, te o o -ble.

### Te 'ka 'pɛ -sru 'e tɔa di!

<sup>17</sup>'An beenun, 'wɛnɛn nɛn -kaa san Zozi Crizi -le 'pasianɔn -a 'vɛ 'e 'cɛn bɛ, -a -cin 'e 'tɔ 'ka 'ji. <sup>18</sup>Waa 'vɛ 'cɛɛ 'nan: «Tu -fɔla "da "ji bɛ, Bali sɛɛ wunɔn -kɔan. O 'ta wo 'o 'bɔ 'ci 'sɔ wɛnɛn 'wɛliɔ -sru.»

<sup>19</sup>Minnun zɛ -wɛɛ Zozinɔn "cɛan 'e cin man. 'O 'bɔ 'wulo -ji 'wɛnɛn da nɛn o 'ta wula, Bali lei 'ka -wɛ "fo "di.

<sup>20</sup>'Pian 'an beenun, 'cee vɛ bɛ, 'wɪ 'nɔ̀nɔ̀n nɛn e 'si Bali 'bɔ̀ 'va, ɛn ka yi -tɛra "da "bɛ, 'ka 'pa 'ka cin va -a -e 'ka 'tɔ̀ 'plɛblɛ! 'Ka Bali trɔ̀ 'ba Bali lei 'saun 'le 'plɛblɛ 'a! <sup>21</sup>Bali 'ka ye "yi, 'ka 'fɔ̀ 'ka leadɪ "man! -Kaa san Zozi Crizi -kaa nyrinda 'si, 'ka yie 'trɔ̀a "da "trilii, -e tɔ̀ nɛn e 'belidɪ nɛn ya'a 'nyaan dɛ -a -nɔ̀an -cɛɛ bɛ, 'e bɔ̀.

<sup>22</sup>Minnun nɛn 'o 'ci -fɔ̀ɔ̀dɪ 'sia bɛ, 'ka o nyrinda 'si! <sup>23</sup>ɛn 'nyian min -mienun a bɛ, o dre wɪ o 'pla Bali -le tin 'badɪ wlu. 'Ka o 'si 'wɪ 'ji, "tɔ̀gɔ̀ 'o 'kɔ̀ 'tɛ 'va! ɛn 'nyian min -mienun a bɛ, 'ka o nyrinda 'si! 'Pian 'ka "klan Bali lɔ̀! -Wee "tri "nɛn -wɔ̀ "bɛ, te 'ka 'pɛ wu "va "dɪ!

<sup>24</sup>Tɔ̀ -dan 'e 'kɔ̀n Bali -le vɛ -a! E -kɔ̀laman 'e yie 'tɔ̀dɪ -a 'ka 'va, -e 'ka vɛlɛ 'ka 'wɪ 'wɪdɪ "dre dɪ.

Tɔ̀ -dan 'e 'kɔ̀n Bali -le vɛ -a! E -kɔ̀laman e -ko 'kaa, -e 'ka -yee -dan ci yɪ, te 'tɔ̀ 'ka 'e 'padɪ 'ka man dɪ, te ci "nrandɪ a 'ka 'lɔ̀.

<sup>25</sup>Tɔ̀ -dan 'e 'kɔ̀n Bali -le vɛ -a! E ya 'e 'tɔ̀wɪ, ɛn -yɛɛ cɪ min 'sizan 'wɪ 'ji -a. -Kaa san Zozi Crizi -le "wean bɛ, 'tɔ̀ -dan a -yee vɛ -a, ɛn mingɔ̀nɛn -blɪdɪ a -yee vɛ -a, ɛn 'plɛblɛ a -yee vɛ -a, ɛn -kɔ̀ladɪ a -yee vɛ -a. -A pou sianan 'li 'e 'cɛn, -e 'e 'bɔ̀ cɛɛgɔ̀ yi -a bɛ, zɪ Bali cɪ zɪɛ, ɛn e -fo -a 'li 'trilii. Amen!